

## SAN PABLO KARTA KOLOSAS ÇXHABTEWE'SX JÏI

*Dxus yakh fxi'zesa Kolosas çxhabtewe'sxtxi  
Pablo fxi'jni*

<sup>1</sup> Adxa' Jesukristo jxkaahnisa Pablo yaaseth, txã'wēte selpiwa'jsa Dxus nvxiitnisa. <sup>2</sup> Txãa pa'ga Dxus luuçx Kolosas çxhabtewe'sx jïi naa karta's fxi'jçxa kajaçthu, Kristo's nwēese'jsawe'sxtxi weçxana yakhthē'j Timoteo yakh. I'kwe'sxtxi' Dxus kwe'sx Tata' pu'çxhina, ewçxáa kaafxi'ze'jna.

*Dxus yakh fxi'zesawe'sx pa'gate Pablo Dxus  
yakh puutx we'weni*

<sup>3</sup> I'kwe'sx pa'gate Dxus yakh puutx we'weççxa', kwe'sxtxi nwe'wesa Jesukristo Tata's wala weçxa'tha'w bagaçxtewa. <sup>4</sup> I'kwe'sxa' Kristo Jesus yakh jxpubamée Dxus luuçx jxukaysa yakh puutx ya'peeygãhna ũsta' jïni'stha'w jiyu. <sup>5</sup> Txã'wē i'kwe'sx jïi cielute jxaawni ũsa' txã'sna jxpa'gaya' sũhçxane'kwe txã'wē ew fxi'ze', sa' Dxus yuwe ewte nvxiitwa'jsa isasa's pta'sxte wēse'jçxane'kwe cielutewe'sxa'sçxáa ũythasya' yajkx. <sup>6</sup> Dxus yuwe ewte nvxiit-sa's pta'sxnisa açxha' txakwe walaana u'jweça' naa kiwete mtee mteewa jxuka. I'kwe'sxwa Dxus peeygãani isasa's pta'sxte', isasa yuhna sũhna jxpa'ganijũjx, ma'wēga pehnana u'j txã'wēy yuuça'. <sup>7</sup> Kwe'sx yakhthē'j Epafxras Kristo's selpisáa txã'wēk

Dxus yuwe ewte nvxiit-sa's i'kwe'sxtxi kaapiya'j txã'sna iipe'ji'kwe. Txã' nyafxíi yu' kwe'sx yakhku mjíi pu'çxsa yu'. <sup>8</sup> Txãak Dxus Espiritu yuuçxá's nwēese'jna peeygãhna ũsta' jina pta'sx.

<sup>9</sup> I'kwe'sx txã'wē ew fxi'zeni's pta'sxiyna, Dxus yakh puutx we'wena nestha'w yu' i'kwe'sx pa'gate, txã'wē Dxus yakh fxi'zewa'ja's kīhte yuhwa jxpubamée wala ew jiyuçxa txãajũ ma'wē yuhwa txutemée fxi'zekahn. <sup>10</sup> Txãa pa'ga i'kwe'sxa' Kristo jiiyã'jçxa', txajx jxkaahni yuuçxá's jxuka kxtey yuuna ewçxáa fxi'zeçxa Dxus yakh fxi'zewa'ja's jweeíçxáa ew piyaane'kwe. <sup>11</sup> Sa' txajũ' kīhte yuhwa jxpubana nxusmée weçxana çxhãçxha fxi'zene'kwe. <sup>12</sup> Txã'wē yũuçxa Dxusa's ũsuh jxuka weçxawa'ja's ji'phune'kwe. Txã' kwe'sxtxi jxpa'gawa'j pheu'jçxa ji'pha' txã'sa' ũsuna txã'sna nwēese'jsa yuutxi' jxukaysatx. <sup>13</sup> Txãak çxhi'dxte fxi'zena ũstewa, txajũ kutxi'jçxa txajx Nçxi'k wedxnisa tasxte nvxiht, <sup>14</sup> txajx Nçxi'k peltunãyçxa nwe'wenisatha'w naa pa'ga.

*Kwe'sx pa'gate Kristo uupa'ga Dxus yakh yuwemée neeyũuni*

<sup>15</sup> Dxusa' kwe'sx yafxte vxyaasame', nawa vxyaaya' kījk txajx Nçxi'k Jesukristo kakwete. Txãasa Kristo' Dxus íçxá', naa kiwete kījkīhtewa thaakwe yaçtewe'sx. <sup>16</sup> Dxusa' txajx Nçxi'k Jesukristo'sku neewe'weçxa nvxiht naa kiwe, cielu, kījkīhçxah ũstxna, kwe'sx yafxte vxyaasáa vxite' kwe'sx yafxte vxyaasamée txãatx jxuka txãaçxaçxáa vxitkahn. Txãa pa'ga

kĩjkĩhwa jxuka Kristo jĩita' txajx vxitnisa, sa' txã'sçxaçxáa nwẽese'jwa'jsata', eçxthẽ'j ma'tx yuu angeleswe'sx ma'tx yuu nawa jxuka. <sup>17</sup> Naa kiwe meetey Kristo' ũsyã'kh yu', sa' ãçxwa txãa íiçxáa ũsa', txajx pa'ga yuuçxáa kĩaĩkĩhwa jxuka ewçxáa ũsta'. <sup>18</sup> Sa' Kristo's jxpa'gaçxa txãa yakh fxi'zesa maazkuẽesatxwa jxuka Kristo íiçxáa jxkaahsa'. Txãak nyafxtewe'sx yu', sa' txãa íiçxáak uuçxawa nyafxte ki' itxi yuu, txãaçxaçxáa bagaçxtewa jxkaahwa'jsa. <sup>19</sup> Dxusa' Kristo's kaakh, nawa le'çxkweçxáa yuhwa vxitemée, Dxus íiçxáak yu'. <sup>20</sup> Sa' Dxusa' maa yuhtxwa nvxihtmée, naa kiwetewe'sx kĩaĩkĩhwa jxuka Kristo's ahçemée yuwe ewuuna pa'jwa'ja'sku vxit, Kristo's kluuste uuwa'j vxitçxa.

<sup>21</sup> I'kwe'sxwa nyafxiaa' Dxus luuçxmée i'kwe yu', Dxusa's açewa'jçxá's yajxna fxi'zesa, ewmeeçxáa yũuna. Nawa ewmeesaçxawa ãçxha' Dxus tasxte pa'jya' ãjawa'ja's Dxusíi pheu'kh, <sup>22</sup> txã'wẽ Kristo's pxthaa yuuçxa uuwa'j vxitçxa. Naasáa kwe'sx kĩaĩ pkaal yuhwa ji'phmée txajx tasxte yuuçxáa selpiina fxi'zekahnku txã'wẽ yũu. <sup>23</sup> Aça' txã'wẽ ew fxi'zeya' ãjaya', Kristo yuuçxá's iiméh ew ũusuh jxuka yajxna txajx yuwe ewsa nwe'wewa'jsa pta'sxni's jii i'kwe txajũ txutenuwe. Txãa Dxus yuwe ewsa nwe'wewa'jsa's txã'wẽ mtee mteewa jxuka pta'sxni yuuça', aça' txã'sna pta'sxkahnku Dxusa' nvxiht adxa's.

*Dxus luuçxtxi selpiikahn Dxusa' Pablo's neewe'weçxa nvxiitnisa*

24 Txãa pa'ga Dxus yuwe's i'kwe'sxtxi pta'sxpa'ga pxthaa yuuna ũsçxawa, wala weçxa'th. Nawa adx pxthaa yuuwa'j yuutxi's wa'lu'çmeeth. Kristowa ma'wêga txajx nasaa pa'gate pxthaa yuuçxa uu txãa pa'ga adxwa pxthaa yuuwa'jsath. 25 Dxus luuçxtxi selpiwa'jsak Dxusa' adxa's neewe'weçxa nvxiht, Dxus yuwe's i'kwe'sxtxiwa pta'sxkahn kîhte yuhwa peejxmée jxuka. 26 Txãniitey bagaçxte yuhwa kaajiyu'jnimeesa ũsu'ne' txã'snak Dxusa' açxha' kaajiyu'j txajx nasatx, aç'a' txã'sna pta'sxwa'jsath. 27 Dxusa' txajx yuwe kaajiyu'jnimeesa iiméh wala selpiwa'jsa yu'k judiu ji'jmée vxite nasatxwa txã'snak kaajiyu'j txajx nasatx. Txã' naak yu': Kristo' i'kwe'sx ũuste u'kak, txãa pa'ga i'kwe'sxa' Dxus tasxte pa'jwa'ja's ji'phi'kwe jîna pta'sxni's i'kwe jiiimée yu'. 28 Aç'a' Kristo i'kwe'sx ũuste khēeni'stha'w kwe'sxa' pta'sxi', yu'kxpehna, kaapiya'jna, jxukaysa wala ew jiyuçxa teeçxsa na'wêçxah Kristo yakh yuuçxáa jxpubamée fxi'zewa'ja's ew piyakahn. 29 Txã'wê yūuwa'ja's kaapiya'jnath txakwe wala çxhãçxha mji', Kristo kîhtewa jxuka pu'çxte.

## 2

1 I'kwe'sxa' mjiiyuwe: Adxa' i'kwe'sx pa'gate vxite' Laodiceatewe'sx vxite' adxna jiiimeesa ũstxna txãawe'sx jxukaysa pa'gate iiméh wala pa'pçxuna Dxus yakh puutx we'wena ũsthu. 2 I'kwe'sx jxukaysa Kristo ma'wēsatewa kîhte yuhwa peejxmée jxuka ew jiyukahn txã'wê pa'pçxuna ũsthu. Txãa Kristok i'kwe'sx ũuste

khêewa'jsa yu' txã'snak txãniitey kim yuhtxwa kaajiyu'jnimée ũsu'. Aça' txã'sna ew jiyuçxa' jxpubamée i'kwe'sx pwe'sx puutx ya'peeygãhna fxi'zene'kwe. <sup>3</sup> Txãa pa'gatey ma'wêçxah jiyuwa'j peejxtewa, Kristo yuuçxáak ũsu'. <sup>4</sup> I'kwe'sxtxi' txã'wêth ew ãate pta'sxi', vxitesa ãsiina zhiçxkwe we'wena kaypuba'jwe'sxte. <sup>5</sup> Adxa' i'kwe'sx yakh ih ũsmeeth, nawa i'kwe'sx yakh ih ũs na'wê yajxna ũsthu ũuste yu', txãasath wala weçxá', Kristo yakh yuuçxáa jxpubamée fxi'zepa'ga.

<sup>6</sup> Txãasa Jesukristo's ma'wêkwe nyafxíi weçxana jxpa'ga txã'wêesa mfxi'zewe txãa yakh txutemée. <sup>7</sup> Bagaçxtewa Kristoçxá's yajxna txãa yuuçxá's nwêese'jna Dxusa's weçxana fxi'zewa'ja's i'kwe kaapiya'jni yuu, txajũ txutenuwe.

*Kristo ãtxĩ yuupa'ga kwe'sxwa pkaluh ãtxĩ yu-uni*

<sup>8</sup> Txãasa i'kwe'sxa' wala mpa'yajxwe, naa kiwete nasaa pwe'sx yajxçxa kaapiya'jniçxá's pta'sxna kaypuba'jwe'sxte. Txãawe'sxa' Kristo kaapiya'jni's kaapiya'jsamée, ewmeesa jxkaahniçxá's kxtey yuusata'. <sup>9</sup> I'kwe'sxa' txã'wê kaapiya'jni's nwêese'jwa'jsa meei'kwe, txãa pa'gatey Kristo' Dxus ma'wêsatewa txãawa txã'wêysa'íçxá'. <sup>10</sup> Aça' i'kwe'sxa' txã'sna ũuste jxpa'ganijũ' Kristo yakh teeçxçxáa i'kwe yuuna pa'ja'. Txãa pa'ga jwee yu' vxite yu' kíhwa peejxmée yã'ji'kwe, txãa pa'gatey Kristoçxaçxáa jxuka jxkaahsa' naa kiwetewe'sx vxite' ãe walasu ewmeesa ũstxna txãa yã'jçxa. <sup>11</sup> Kristo's ũuste

jxpa'ganiyũyã'ja', cirkuncidãyni na'wẽ yã'ji'kwe neeyũ'. Nawa peekx kakwetewe'sxna cirkuncida'itx txãamée, i'kwe'sx ewmée yũuna fxi'zenijũ Kristo nwe'wenisa cirkuncidãyni yaase'. Kristo' txã'wẽçxáak yu'. <sup>12</sup> Txã'wẽ yũunijũ' i'kwe'sxa' yu'te ya'bautisãychxa' Kristo yakh ja'da pedani na'wẽsa i'kwe yuu, sa' Kristo yakh ja'da ki' itxi yuusáa na'wẽ i'kwe yuu, txã'wẽ Kristo uutewa Dxusa' ki' itxi vxitku sũhwa'ja's ji'phui'kwe naa pa'ga. <sup>13</sup> Nawa nyafxíi yu' i'kwe'sxa' pkalpa'ga Dxus dxi'pte uuníi na'wẽi'kwe ũsu', pkaluh tx-udenimée. Txã'wẽtewa ãçha' Dxusa' pkaltxi jxuka peltunãypa'ga i'kwe'sxa' Kristo na'wẽy itxi yuusáa na'wẽ i'kwe yuu. <sup>14</sup> Kwe'sxa' Dxus jxkaahni's nwēese'pha'gamée yuuwesane'tka'w yu'. Nawa Kristo kluuste uupa'ga Dxusa' jxuka peltunãyku. <sup>15</sup> Sa' txã'wẽçxáa yuumée, eçthẽ'j txãa yakh ũssa yã'jçxa jxuka knayçxa Kristoçxaçxá's bagaçxtewa nwēese'jwa'ja's vxitçxak nvxiht Dxusa'.

*Naa kiwetewe'sxa's nwēese'jmée  
cielutewe'sxa'sçxáa mpaakwewe*

<sup>16</sup> Txã'wẽ Kristo nwe'wenisa yã'ja' ãçha' kim yuhwa leya's nwēese'jwa'ja's jxkaahwa'j ji'phmeeta', i'kwe'sx ũ'ni's we'wena meeçxa' ki'swa'j en txã'wẽsatx. <sup>17</sup> Txã'wẽ yũunisa' naasáa teeçx pa'jwa'jsa ũsu'k txã'sna jxpa'gawa'ja's kaapiya'jsaçxáatx yu'. Aça' ew jiyute yu', txãa pa'jwa'jsa' Kristok yu'. <sup>18</sup> I'kwe'sxa' ãsxiisawe'sxtxi mpa'yajkxwe. Txã'wẽme', txãawe'sxa' wala ewsatha'w jĩna aneleswe'sxtxi neewe'wena, kĩhwa

uysameeçxawa txã'wẽ ewsaçxá's î'khsatha'w jĩna iiwejçx we'wena i'kwe'sxtxi kaypuba'jatxna. <sup>19</sup> Txãawe'sxa' Kristo yakh fxi'zesameeta'. Kristo yakh fxi'zewaç yu', wala yuh ewna, txãa pa'gatey Kristo kĩhtewa jxuka kçxhãaçxha'jna txajx nasa yuutxi' jxpe'jsa', Dxus jxkaahni's kxtey yuuna.

<sup>20</sup> I'kwe'sxa' naa kiwete piçthẽ'jwe'sx we'weni's nwẽese'jya'mée, Kristo yakh ja'da uusáa na'wẽ yuusáa i'kwe. Sa' çkĩjxa'çxáa piçthẽ'jwe'sx we'weni's nwẽese'jwa'jsamée yã'jçxa', txãawe'sx txã'jĩna jxkaahnitxi' nwẽese'jna ũsuki'kwe? <sup>21</sup> Txãawe'sxa' na'wẽtx jxkaaja': Txã'sa' jxa'dxnu, txã'sa' ũ'nu, txã'sa' jxpa'ganu jĩna kĩjkĩhwa wala jxkaaja'tx. <sup>22</sup> Txã'wẽ jxkaahnisa' naa kiwete piçthẽ'jwe'sx kaapiya'jnisaçxáata', jxuka skhẽwwa'jsa. <sup>23</sup> Txãatx jxpa'yakxmeete', ewsa na'wẽ yuh theguna, txãa pa'gatey iiwejçx yajkxmée peekx kakwe's ew kaafxi'ze'jwa'ja'sku jxkaaja'. Nawa naa kiwete ewmée yajkxna fxi'zeni's yu' neeweya' aja'çme'.

### 3

<sup>1</sup> I'kwe'sxa' Kristo yakh ja'da ĩtxi yuusáa na'wẽ yuusáa yã'jçxa', cielute iiméh zhiçxkwesa bagaçxtewa wẽt fxi'zewa'ja'sçxáa mpaakwewe, Dxus pukate Kristo ũsnitewe'sxna. <sup>2</sup> Naa kiwetewe'sxa's yajkxmée, cielutewe'sxçxá's myajkxwe, <sup>3</sup> txãa pa'gatey i'kwe'sxa' Kristo yakh ja'da uusáa na'wẽ yuupa'ga, Kristo yakh fxi'zeçi'kwe Dxus tasxte. <sup>4</sup> Sa' i'kwe'sxtxi ĩtxi kaafxi'ze'jsa Kristo vxyaate', i'kwe'sxwa txãa

ma'wēsate' txā'wēysa yuuçxa txāa yakh ih  
 ũsya' u'jwene'kwe.

*Ewmeesatxi' nvxihtçxa ew yūuna fxi'zenitx  
 jxpa'gani*

<sup>5</sup> Txāa pa'ga i'kwe'sx ũus yaakxni ewmeesa  
 naata' txāatxi' jxuka manvxihtwe: ptamumey  
 pkalte fxi'zeni, ptamsaçxawa vxitesa yakh pkal  
 yūuna fxi'zeni, kīhwa ewmée yūuwa'jçxá's  
 yaakxni, Dxus yu's yajkxmée jweeíçxáa ji'phu  
 wēena fxi'zeni, (txā'wē ji'phu wēeniçxá's  
 yajkxte', txā'sçxáanak Dxus na'wē yaakxwa'j  
 kaseje'.) <sup>6</sup> Txā'wē ewmée yūupa'ga  
 íçxáa Dxus kastigo seena'sa yuja' Dxusa's  
 nwēese'jsameewe'sxtxi. <sup>7</sup> I'kwe'sxwa txā'wē  
 yūuna fxi'zesai'kwe yu'. <sup>8</sup> Nawa açxha'  
 na'wēsatax jxuka manvxihtwe: pxūuskwe  
 yaakxni, ũusçxani, vxitetx ewmée nuywe'weni,  
 wēesxuni, kazx we'weni txā'wēsatax. <sup>9</sup> Txāa  
 pa'gatey jxuka nvxiht yā'ji'kwe na' puutx  
 ya'isxiina fxi'zemée, <sup>10</sup> ewçxáa yūuna  
 fxi'zewa'ja's jxpa'gaçxa ũsi'kwe. Txā'wē yūuçxa'  
 i'kwe'sxa' jweeíçxáa ya'yu'pthehna u'jwene'kwe,  
 Dxusa's ew jiyuna pa'jçxa txāa na'wēy yuuna  
 pa'jya'. <sup>11</sup> Aça' txā'wē ya'yu'pthehnisá'  
 maawa jxuka kxteeçxah teeççxáa yuuna  
 pa'jsata'. Judiuwe'sx ma'tx yuu, judiuwe'sxmée  
 ma'tx yuu, cirkuncidāynisawe'sx ma'tx yuu,  
 cirkuncidāynimeesawe'sx ma'tx yuu, wala  
 jiisa ma'tx yuu, jiimeesa ma'tx yuu, patron  
 ji'phsa ma'tx yuu, patron ji'phmeesa ma'tx yuu  
 nawa maawa jxuka kxteeçxah teeççxáa yuuna



pa'jsata'. Txãa pa'gatey Kristo's jxpa'ganiçxãa txã'wẽ', Kristo jxukaysawe'sx jĩ'.

<sup>12</sup> I'kwe'sxa' Dxus peeygãhçxa txhitxnisai'kwe, txãa pa'ga i'kwe'sx ùuste na'wēsatsx jxpa'gaçxa mfxi'zewe: vxitetx peeygãawa'ja's, pu'çxna fxi'zewa'ja's, iiwejçx yajkxmée maa yakhwa jxuka ewçxáa fxi'zewa'ja's, puutx ùusçxa yajkxmée fxi'zewa'ja's.

<sup>13</sup> Makwe ewmée nuywe'wetewa puutx ya'peltunãyna mfxi'zewe. Kristowa ma'wēga i'kwe'sxtxi peltunãy txã'wēy myũuwe i'kwe'sx pwe'sx.

<sup>14</sup> Sa' peeygãhna fxi'zewa'j yuuçxá's kīhtewa thaakwe wala mji'phuwe. Txãa maatewa thaakwe peejxsa'.

<sup>15</sup> Txã'wẽ yũunijũ' Dxusa' ùsuna jxukaysa kxteeçxah ùuste wēt weçxana fxi'zewa'ja's. Txã'wẽ jxukaysatsx kxteeçxah teeçxçxáa vxit-ya'fiçxáak Dxusa' i'kwe'sxtxi txhitxh, txãa pa'ga mweeçxawe.

<sup>16</sup> Açxha' Kristo kaapiya'jni's i'kwe'sx ùuste jxuka mpiyawew. Txã'wẽ yũuçxa puutx kaapiya'jna, wala jxpa'yakx puutx yu'kxpehna, Dxusa's ùuste weçxana memna mfxi'zewe.

<sup>17</sup> I'kwe'sxa' kīh yũuna ùsçxawa, Kristo Jesusa's tuuthe'jwa'ja's yuuçxáa myajkxwe, Dxusa's yuuçxáa weçxana.

*Yattewe'sx maa yakhwa jxuka ya'nwēese'jna fxi'zeni*

<sup>18</sup> Nyuuwe'sxa' i'kwe'sx nmi'tx nwēese'jwa'j ji'phi'kwe. Kristo's jiiyã'jçxa', zhiçxkwe fxi'zewa'ja'.

<sup>19</sup> Aça' nmi'we'sxwa peekx nyuu yakh puina yahçemée peeygãhna mfxi'zewe.

<sup>20</sup> Txã'wēy luuçxwe'sxwa i'kwe'sx neywe'sxtxi kīhtewa jxuka mwēese'jwe. Txã'wẽ yũuni's

Dxusa' weçxa'k. <sup>21</sup> Neywe'sxa' peekx luuçxtxi zhiçxkwe yu'kxpehna miipe'jwe pksuumée, i'kwe'sx yakh kuçxkahmen. <sup>22</sup> Selpisaawe'sxa' naa kiwete i'kwe'sx patronwe'sx jxkaahnitx wa'lmée mwēese'jwe kīhtewa jxuka. Patronwe'sx thegna ūste āajuçxáa nwēese'jmée, ūsuh jxuka wa'lmée mwēese'jwe, Dxusa' jiina sūhna. <sup>23</sup> Kīh mjīiççxawa wa'lmée Kristo's selpiīçthi sūhnaçxáa kxtey myuuwe, nasatx selpiīçthi sūhmée. <sup>24</sup> Txā'wē yajkxna selpiipa'ga, Kristo' i'kwe'sxtxi' cielute deweena, txāa pa'gatey Kristo jīi sūhçxane'kwe mjīi naa pa'ga. <sup>25</sup> Nawa maawa wa'l yajkxna mjīisa' açxamée ewsaçxá's jxpa'gatxna, txāa pa'gatey Dxusa' jxuka jiia' ma'wē yūuna fxi'zesatewa.

## 4

<sup>1</sup> Patronwe'sxa' i'kwe'sxtxi selpisaatx ewçxáa jxpe'jna meswe. Txā'wēme', i'kwe'sxwa selpisáa íiçxáa i'kwe, i'kwe'sxtxi jxkaahsa' Kristo cielute ūsa'.

<sup>2</sup> Açxha' wala jxpa'yakx Dxus yakh yuuçxáa puutx we'wena meswe, peçxkanamée Dxusa's weçxana. <sup>3</sup> Sa' kwe'sx pa'gatewa txā'wēy Dxus yakh puutx we'wena meswe, Dxus yuwe pta'sxwa'j en vxyaakahn, kxah Kristo's ma'wē ūuste jxpa'gawa'ja'swa jiyunimeesa's pta'sxi'nja. Txā'wē pta'sxpa'gaíiçxáa adxa' preesu ūsthu.

<sup>4</sup> Nawa Dxus pu'çxte', sxiigmée ew āate kaa-jiyu'ju'nja.

<sup>5</sup> Dxusna jiimeesawe'sx yakh wala jxpa'yakx ewçxáa mfxi'zewe, ewmée we'wekahmen. Sa' Dxus yuwe pta'sxwa'j ena's ivxiitnuwe.

6 I'kwe'sxa' zhiçxkwe ewçxáa jxpa'yakx mwe'wewe. Txã'wě yũuçxa', ma'wěsa yakhwa thěymée pasya' ājane'kwe.

*Yuwe weçxaa kaahnitx fxi'jni*

7 Kwe'sx yakhthě'j Tíkiko Kristo's selpiik adx yakh ja'da kīhtewa pu'vxitumée pu'çxna txã' i'kwe'sxtxi pta'sxina adx fxi'zeni's. 8 Txã'wě pta'sxna i'kwe'sxtxi kçxhãaçxha'khan kajaçthu. 9 Txãa yakh teeçx pi'kxna yuja', Kristo's jxpa'gasa kwe'sx yakhthě'j Onésimo. Txã' i'kwe'sx çxhabteywe'sxa'. Txãawe'sx pa'jçxa jxuka pta'sxixna aysũ kīhçxah yũuçtewa.

10 Karcelte adxna pi'kxna ũssa Aristarkowa yuwe weçxa kaja'k, vxite' Bernabé pukakhě nyakh Markoswa. I'kwe'sxa' jiiyã'ji'kwe Markos ma'wēsatewa, txãa pa'ga wa'lmée mpa'gawe. 11 Jesus Justo jĩ'tx txãawa yuwe weçxaa kaja'k. Judiuwe'sx Kristo's jxpa'gasa adxa's pu'çxsa yu' txãawe'sx yuuçxáatx yu', Dxus jxkaahwa'ja's pta'sxsa. Txãa pa'ga adx yakha' wala weçxa yuja'. 12 Kristo's selpisáa Epafxraswa yuwe weçxaa kaja'k. Txã' i'kwe'sx yakh ũssak yu'. Txã' i'kwe'sx pa'gate bagaçxtewa Dxusa's neewe'wena nesku yu', kīhtewa jxpubamée Dxus jxthãasniçxá's kxtey yuuna fxi'zekahn. 13 Adxa' jiith Epafxrasa' i'kwe'sxtxi yajkxna wala pa'pçxu'k, Dxusa's neewe'wena. Sa' Laodicea çxhabtewe'sx vxite' Hierapolis çxhabtewe'sxtxiwa txã'wěyku Dxusna neewe'we'. 14 Médiko Lukas vxite' Demas txãawe'sxwa yuwe weçxaa kaja'tx.

15 Yuwe mweeçxawe yakhthê'jwe'sx Laodiceatewe'sxtxi vxite' Ninfxasna, sa' txajx yatte pkhaakhesawe'sxtxiwa txã'wêy. 16 Naa karta's i'kwe'sx pwe'sx lëeyna jxã'jçxa', mkaahwe Laodicea çxhabte pkhaakhesawe'sx lëeykahn, sa' Laodicea çxhabtewe'sxtxi karta kaath txãa karta i'kwe'sx tasxte pa'the', txã'snawa mlëeywe. 17 Arkiposa's na'jïna myu'kxpehwe: Kristo mjïia's kxtey myuu jïna.

18 Adx kuseju yuu naa karta's fxi'jçxa kajaçthu i'kwe'sxtxi weçxana. Nawa adxa's peçxkanamée yajxna mfxi'zewe, preesu ũsthu naa pa'ga.

I'kwe'sxtxi' Dxusa' pu'çxhina.

**Dyus Yuwe U'sesa**  
**Páez: Dyus Yuwe U'sesa New Testament**

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 21 Feb 2024 from source  
files dated 29 Jan 2022

06da09f4-8d0f-5001-ae8c-0e6aa0131ffd